

Waor of niet waor?

Dick van Bloemendaal

Hele kleine verhaoltsjes die soms warkeluk gebeurd bin en verhaoltsjes die ik uut m'n duum 'ezeugen het. Veur julie een vraag, mar veur mien een weet, welke wel of niet waor bin.

De kiepeslachers

We woenden an de Darpsstraot op de hoek mit de Engweg, een dubbel huus waarvan wulie de linkse kant bewoenden, dus tegen de Engweg an. M'n vaoder had een poliersbedrief mit een kiepeslachtereij der bie. Ut kiepeslachten ging vrogger nog helemaol mit de hand. De slachers zatten op de kiepekisten, die van houte latten en dik gaos 'emaakt waren en waor je de kiepen d'r in en d'r uut kosse kriegen via een schuuf.



We han een paor vaste slachers en ok wel keerls die of en toe us kwamme helpen. Willem en Gaart Kiep en Kees van Cozien waren keerls die d'r altied waren. Willem zat altied op de eerste kist en haolde de kiep uut de kist, hul um an z'n poten um leeg en gaf um mit de achterkant van ut slachtmes een beste klap op



z'n kop en snee um dan z'n strot deur boven een emmer tot ie was uut 'ebloed. Gaart nam dan de kiep over en haolde mit z'n hand alle veren van de kiep of en dan de stoppels mit een mesje (dat neumen ze plukken en stoppelen). Kees snee de kiep vanachteren veerder open en haolde de ingewanden, ut maagje, de lever, ut hartje en de nieren d'r uut. Ut

maagje werd uut 'epeld en dan ging de hele zoi, behalve de darmen, weer naor binnen. De poten werden d'r of 'esneejen en dan werd ie effe boven een spiritus vlammetje 'ehouwen um alle veerdere troep d'r of te branden. As ie helemaal schoon was werd ie op'emaakt en ging ie in vetvrie papier en was de kiek klaar vur de handel.

+++